

Tun Dr. Mahathir Mohamad

Saran Pusat Kajian Strategik Sabah Kaji Jenis-Jenis Peperangan

BEKAS PERDANA Menteri Malaysia, Tun Dr. Mahathir Mohamad memuji UMS terhadap cadangan penubuhan Pusat Kajian Strategik Sabah. Menurut beliau, penubuhan Pusat Kajian itu amat bertepatan dalam usaha membantu kerajaan untuk mengukuhkan aspek pertahanan dan kedaulatan negara. Justeru, beliau menyarankan agar pihak UMS mengadakan penyelidikan terhadap jenis-jenis peperangan khususnya sistem peperangan gerila yang disifatkan sukar untuk dikalahkan.

Tun Dr. Mahathir berkata, kajian terhadap sistem peperangan itu penting memandangkan teknik tersebut merupakan sistem peperangan yang sering digunakan pada masa kini.

"Sistem Perang gerila ini bukan seperti peperangan biasa. Kalau kita tidak meningkatkan kecekapan kita dalam jenis peperangan seumpama ini, besar kemungkinan negara kita tidak dapat diselamatkan," katanya ketika mengulas cadangan UMS untuk menubuhkan Pusat Kajian Strategik Sabah.

Terdahulu, Tun Dr. Mahathir dalam syarahan perdananya yang bertajuk Peranan Generasi Muda Ke Arah Negara Maju dan Berdaulat pada 16 Mac lalu berkata Kemajuan dikecapi negara masa kini bukan datang dengan sendirinya tetapi adalah hasil usaha dan perjuangan pemimpin terdahulu dan rakyat perlu menghayatinya.

Sambil menegaskan, rakyat Malaysia kini menikmati pembangunan dalam semua peringkat termasuk pembangunan minda, beliau berkata perkembangan itu memerlukan generasi muda melengkap

diri dengan ilmu terkini terutama dalam bidang sains dan teknologi. "Kita sedar bahawa kemajuan kita, hidup selesa dan kebahagiaan bukan datang dengan begitu mudah tetapi ia diusahakan, jika kita sedar maka kita boleh menyediakan diri kita untuk masa depan, kita membekalkan diri kita dengan ilmu pengetahuan yang tidak statik dan sentiasa bertambah seumur hidup," katanya.

Beliau menambah, generasi muda pada zaman sekarang berpeluang mendapat ilmu pengetahuan tanpa batasan berbanding pada zaman dahulu, sekali gus mereka dapat berfikir dan menilai apa juga pendapat dan pengaruh terutamanya dari negara luar.

"Sekiranya rakyat ingin melihat negara maju, ia bukan saja perlu menguasai ilmu terkini tetapi juga perlu berpegang dengan nilai-nilai dan sifat yang baik serta mulia yang pasti boleh menyumbang kepada kemajuan negara... inilah peranan penting muda mudi di negara ini," katanya. Turut hadir bersama lebih 3,000 hadirin ialah isteri Tun Mahathir, Tun Dr Siti Hasmah Mohd Ali; Ketua Menteri Sabah, Datuk Seri Musa Aman, Naib Canselor UMS, Datuk Mohd Harun Abdullah; Pengerusi Lembaga Pengarah UMS, Tan Sri Abdul Hamid Egeh serta ahli akademik UMS.

■ Oleh: Salbinous Saribun

